

Política

Parlamentario Tico Croes di AVP,

E GRAN EHEMPEL DI LOKE ARUBA TIN MESTER COMO GOBERNANTE

O'STAD-Ayera durante tratamiento di e presupuesto pa aeropuerto, e Parlamentario di AVP, Tico Croes, a acapará atencion di hopi hende mes pa su forma corecto y cla di hiba política den Sala di Parlamento. Kedando al caso, tratando puntonan esencial y tambe dunando un splicacion bon cla kiko enberdad mester haci cu nos aeropuerto, Tico a muestra bon cla cu tin speranza cu henter nos sistema político por cambia aki poco tempo. Ningun momento e hoben político aki a desviá di e tema, contrario otronan liga na e gobierno, cu ta sconde nan incapacidad tras di tópiconan cu no ta al caso.

~~durante di e sesion~~

aki por nota cu tin varios político, incluyendo di e partidonan di gobierno, cu ta duna muestra di e cambio cu mester bin den nos Parlamento. Entre otro Minister Ella Tromp Yarzagaray a duna un presentacion masha ehemplar y a trata tur hende manera colega di trabow, trahando conhunto pa desaroyo di nos país. E único problema di gobernantenan manera Minister Yarzagaray, ta cu tin ora nan mester actua contra di nan propio pensamiento y caracter ya cu no por laga propio coleganan di coalicion na caya. Esaki ta e triste realidad cu mester pone un fin na dje.

Tico Croes ayera nochi tabata un alivio, mes cu

varios di su coleganan di partido, y ta muestra cu mester bin un cambio den henter nos sistema político. E lider di OLA, Glenbert Croes ta otro mas cu ta destacá den su ponencianan y e único resistencia cu e tipo di políticonan aki ta ricibí, ta di otro colega y contrincantenan frustrá y incapacitá cu por sigui funcioná únicamente den e sistema anticuá cu nos tin te na e momentonan aki.

Aruba tin mester di un cambio y políticonan manera Tico Croes ta indicando e caminda. Tanto capacidad y tanto efectividad mester ricibí su recompensa tardi of tempran.

Diba